

manger, la faim me fit prendre ma part : mais i'en eü la bouche puante iufqu'au lendemain.

Auec toutes ces miferes, dans les Saults que nous rencontrions, ie portois d'auffi gros fardeaux que ie pouuois : mais fouuent i'y fuccombois ; & c'est ce qui donnoit à rire à nos Sauuages, qui se railloient de moy, & difoient qu'il falloit apeller vn enfant, pour me porter auec mon paquet. Nofre bon Dieu ne m'abandonnoit point tout à fait en ces rencontres, mais il en fufcitoit fouuent quelques vns, qui touchés de compaffion, fans rien dire, me dechargeoient de ma Chapelle, ou de quelque autre fardeau, & m'aïdoient à faire le chemin vn peu plus à laife.

[27] Il arriuoit quelques fois qu'après auoir bien porté des paquets, & apres auoir ramé tout le iour, & mefme deux ou trois heures dans la nuit, nous nous couchions fur la terre, ou fur quelque rocher fans fouper, pour recommencer le iour d'après auec les mefmes trauaux. Mais par tout la prouidence Diuine meffoit quelques peu de douceur & de foulagement à nos fatigues.

Nous fûmes prés de quinze iours dans ces peines, & après auoir paffé le Lac Nipiffirinien, lors que nous defcendions vne petite Riuiere, nous entendifmes des cris lamentables, & des chanfons de mort. Nous abordons à l'endroit d'où venoient ces clameurs, & nous yifmes huit ieunes Sauuages des Outaouïacs, horriblement brulés, par vn accident funefte, d'une étincelle [28] de feu, qui tomba par mefgarde dans vn baril de poudre : Il y en auoit quatre, entre autres, tout grillés, & en danger de mort. Ie les confolay, & les difpofay au Baptême, que ie leur euffe conferé, fi i'euffe eü le loisir de les voir affés difpofés ; car